

ROZÁRIU NO LAUDTAO SI'

“Nia mak Feto ne’ebé «hatais ho loron, fulan iha nia ain okos no ho koroa ho fitun sanulu-resin-rua iha nia ulun» (Ap 12,1). Sa’e tiha ba lalehan, nia mak Inan no Liurai Feto kriaun tomak nian. Iha nia isin ne’ebé glorifika tiha ona, hamutuk ho Cristo ne’ebé moris hi’as, kriaun nia baluk ida hetan ona plenitude tomak nia beleza.” Laudato Si’ 241

Papa Francisco assina Laudato Si’ iha 24 Maiu, bainhira Kreda selebra “Festa Maria Auxiliadora dos Cristãos”. Ida-ne’e mak oportunidade di’ak ida mai ita atu medita iha Maria nu’udar “Liurai-Feto kriaun tomak nian.” (Laudato Si’, 241).

MISTÉRIU KSOLOK NIAN

1 - ANUNSIASAUN

Liu tiha fulan neen, Maromak haruka anju Gabriel ba knua ida Galileia nian, naran Nazare, 27ba fetoran ida ne’ebé hakotu tiha ona ba mane ida naran Jose, husi David nia uma-kain; fetoran ne’e naran Maria. 28Tama tiha iha nia uma, anju dehan: “Rahun diak, feto kmanek wa’in tebes! Na’i ho ita!” ...Ó sei ko’us no tur ahi oan mane ida. O sei hanaran Nia Jezús... Maria dehan: “Ne’e sa, Na’i nia atan oan mak ne’e. Halo tuir ita liafuan bá!”.” (Lc 1, 26-28,31,38).

“Halo tuir ita liafuan bá.”

Ida-ne’e mak resposta livre ida kriatura nian ba presente Kriadór nian; resposta ne’e esprime disponibilidade no abertura ba “milagre” atu akontese liuhusi Maromak nia Espíritu nia kbiit. Kriaun. Kriadór nia obra domin nian, iha ninia lei naturál sira ne’ebé Maromak rasik respeita: Maromak la viola harmonia naturál ne’ebé presente iha ninia obra domin nian. Ema ninia hakaran livre, nakloke ba Maromak nia hakaran, halo atu bele muda istória. Maromak nia Espíritu, ohin, hamosu iha ita konxiénsia atu fó “SIM” laran-luak nian, no dalaruma ho sakrifísiu, atu bele prezerva no kuida harmonia kriaun nian. Papa Francisco hateten:

“...ita hatene katak ita sei bele halo mudansa. Kriadór sei la hewai ita, nia la fila kotuk ba ninia projetu domin nian, no nia la hakribit ita tanba Nia mak halo ita. Umanidade iha mós kapasidade atu tulun harii ita-nia uma-komún..” (LS 13). “... ser umanu sei bele hala’o intervensaun pozitiva ida. Tanba Maromak halo nia atu hadomi, iha ninia limite-sira nia leet natubu jestu-sira laran-luak nian, solidariedade no atensaun” (LS 58).

Tan ne’e, mai ita sai, ema sira ne’ebé haklaken katak bele hari’i "lalehan foun ida no rai foun ida" (Ap 21,1); mai ita lori esperansa,, sai sasin mudansa nian. Ita iha ezemplu boot iha Na’i-Feto.

2- VIZITASAUN

"Iha loron hirak ne’ebá Maria hiit an lalais ba foho, ba knua ida iha Juda.To’o tiha Zacarias nia uma, nia kumprimenta Isabel. Wainhira Isabel rona Maria nia lia, nia nakonu ho Espiritu Santu " (Lc 1, 39-41).

“Nia hiit an lalais”.

Maria, ne’ebé experienta Maromak iha ninia an rasik, hatudu valór esesniál relasaun no komunikaun nian iha dinamismu kriaun. Moris naturál iha rai bele akontese se iha relasaun harmonia no saudavel (ekolójika) entre kriatura sira no ambiente, no entre kriatura hotu sira. Moris ne’ebé dudu dinamizmu

kriasaun nian mós tranzmite nu'udar forsa espirituál ho liafuan ne'ebé komunika: "Nia rona kumprimenu no sai nakonu ho Maromak nia Espíritu ", nu'udar forsa ita-nia forsa nian (kf LS 40,28-31).

Papa Francisco fó hanoin mai ita katak Maromak tau dinamizmu Santíssima Trindade nian nu'udar marka iha kriasaun tomak, no insiste katak “buat hotu iha ligasaun ba malu” (LS 116, 91, 117, 138, 240). ... “Ida-ne'e hameno ita la'ós de'it atu hafodak tanba ligasaun oioin entre kriatura sira, maibé dada mós ita atu hetan xave ida ba ita-nia realizasaun rasik. Tuir loloos, pesoa umana buras, sai tasak no santifika-an liután, bainhira relasiona ho ema seluk, haketak hosi nia an-rasik atu moris iha komuñau ho Maromak, ho ema seluk no ho kriatura-sira tomak.. Buat hotu iha ligasaun ba malu, no ida-ne'e hameno ita atu hatasak espiritualidade ida solidariedade globál nian ne'ebé tubu hosi mistériu Trindade nian”. (LS 240).

Mai ita sai hanesan Maria: pronta atu komunika Maromak nia kbiit no nakfilak kriasaun.

3- NATIVIDADE

“José no Maria husi Nazaré bá Belém. “Wainhira sira sei iha ne'ebá, Maria nia loron atu tur ahi to'o dau-daun. Nia tur ahi nia oan mane boot, hodi haneras no hatoba nia iha balada han fatin” (Lc 2, 6-7)

João iha ninia Evanjellu nia prólogu fó mai ita xave ida (Jn 1,1.3.9-11.14):

Iha inísiu iha Liafuan... no Liafuan mak Maromak... Husi Nia halo buat hotu... Iha Nia iha moris... Roman loos ne'ebé fó naroman ba ema hotu hodi mai iha mundu... Nia mai iha mundu, maibé mundu la rekoñese Nia.

Ohin ita sei bele aseita Liafuan ne'ebé rona loos atu leno ita-nia konxiénsia sira no halo ita haree nesesidade atu halo mundansa radikál, konversaun ekolójika atu respeita, kriatura sira, tau matan ba uma komún no ema sira ne'ebé vulneravel liu iha rai ne'e, ka, ita bele la iha interese, nega naroman lia-loos nian. Ita hili ida-ne'ebé: moris ka mate?

Papa Francisco fó hanoin mai ita: “Maromak, ne'ebé bolu ita atu ita saran-an no saran ba Nia buat hotu, mos haraik mai ita kbiit no naroman ne'ebé ita presiza atu lao ba oin. Iha mundu ida-ne'e nia fuan laran, sei iha nafatin Na'i moris nian, ne'ebé hadomi tebes ita. Nia la husik ita, nia la husik ita mesak, tanba Nia hamutuk ba nafatin ho ita-nia rai no ninia domin dada nafatin ita atu buka dalan foun sira. Ita sei hahí Nia!” (LS 245).

Mai ita husik atu Liafuan tama iha ita-nia istória, moris iha ita-nia konxiénsia sira, basá ita hatene katak, nakukun sei la manán Liafuan nia roman (Jn 1,5).

4 - APREZENTASAUN

"Liu tiha tempu hamoos an nian, tuir Moises nia ukunfuan, José no Maria lori labarik ba Jerusalém atu saran Nia ba Na'i, nu'udar hakerek iha Na'i nia ukun-fuan, katak “Oan mane boot hotu sei saran ba Na'i” (Lc 2, 22-23).

“Nu'udar hakerek iha Na'i nia ukun-fuan.”

Iha tempu antigu salan hakotu relasaun entre ema sira no Maromak, entre kriatura no Kriadór. Ninia konsekuénsia sira iha natureza: halakon armonia iha kriasaun. Ne'e mak sala orijínal, ne'ebé Génesis haktuir nu'udar lakon Paraízu: Maromak tau ema iha jardín atu nia tau matan no hakonu (Gen 2,15), maibé ema dezobedese. Tanba ne'e mak ba Sarani sira fiar, kesi fali relasaun ne'ebé kotu mak Aliansa Foun ne'ebé Jezús halo. Jezús hamoos no konsagra hikas, hamoos salan no konsagra kriasaun tomak ba Maromak.

Jezús nia moris mak ezemplu konsagrasaun no purifikasaun nian. Papa Francisco fó hanoin mai ita:

“Jesus moris iha armonia plena ho kriaun, ne’ebé halo ema hakfodak: «Ema ne’e sé loos, ne’ebé anin no tasi mós halo tui de’it» (Mt 8,27). Nia la apresenta-an nu’udar axeta ida ne’ebé haketak-an hosi mundu ka funu-balun hosoru buat hotu ne’ebé fó prazér ba moris. Bainhira koalía kona-ba nia an-rasik, nia hateten: «Oan Mane mai, han no hemu, no sira dehan: “Nia kaan-teen no lanu-teen”» (Mt 11,19). ... Ita sei haree katak nia saran tempu naruk hosi ninia ezisténsia iha rai ne’e ba knaar [badaen-ai] ida-ne’e, hodi moris simples liu ne’ebé la halo ema ida hakfodak: «Nia la’ós badain, Maria nia oan?» (Mc 6,3) (LS 98).

Ita la presiza halo buat boboot atu konsagra ita-nia moris ba rai nia salvasaun. Ita presiza sai hanesan Jezús, assume ninia espiritualidade: moris iha simplisidade, serbisu, apresia ho moderasaun rai nia soin sira, liuliu, nafa tin rekoñese ho konviksaun katak «menus liután, di’ak liután» (LS 222), hodi buka restaura relaionamentu justu entre ema sira,rai ho Kriadór. Ida-ne’e mak konversaun ekolójika ne’ebé bele kura no (no so’i) kriaun.

5 – LAKON NO HETAN HIKAS JEZÚS IHA TEMPLU

"Labarik Jezús hela iha Jerusalém; nia aman sira la hatene. Liu tiha loron tolu, sira hetan fali Nia iha templu, tur hela iha ema matenek sira leet, hodi rona no husu sira" (Lc 2, 43-46).

“... Iha ema matenek sira leet, rona no husu sira.”

Ita haree Jezús iha-ne’e nu’udar ema loloos (no Maromak loos) ne’ebé presiza aprende, sai boot, sai tasak, no fó fuan barak. Ita aprende hodi rona no husu ema sira seluk. Iha-ne’e dala ida tan relasionamentu: aprende mak relasaun iha troka malu koñesimentu, skills, téknika, kultura, arte, fiar, nst. Presiza iha simplisidade, simu ita-nia an ho haraik-an. Jezús hatudu katak “haraik-an mak la’o iha lia-loos”.

Papa Francisco hatudu mai ita katak ita presiza aprende husi ema seluk atu sai di’ak liután. Ida-ne’e ita hetan iha kapitulu 1 Laudato Si’ nian: Amu-Papa uza siénsia atu halo diagnoze di’ak kona-ba danu sira ita halo ba rai hodi atua ho desizaun di’ak. Amu-Papa mós hatudu katak siénsia tenke mós aprende husi sabedoria/matenek sira seluk atu bele serví ema ho modu integrá

Fragmentasaun koñesimentu nian hala’o nia knaar iha tempu ne’ebé atu hetan aplikasaun konkreta, maibé dala barak halakon sentidu globál nian, ninia horizonte luan, hosi relasaun-sira entre buat ne’ebé eziste: sentidu ida ne’ebé lakon ninia importánsia. Ida-ne’e la fó biban atu haketak dalan-sira ne’ebé loos atu hadi’ak problema-sira kompleksu liu iha mundu ohin loron nian, liuliu sira ne’ebé relasiona ho meiu-ambiente no ho ema kiak sira, ne’ebé la bele hasoru hosi perspetiva ida de’it ka hosi interese nia oin ida de’it. Siénsia ida ne’ebé hakarak oferece solusaun ba problema boot sira, tenke konsidera buat hotu ne’ebé konesimentu hamosu tiha ona iha área koñesimentu nian sira seluk, hodi inkluí mós filozofia no étika sosiál... Iha realidade konkreta ne’ebé litik ita, mosu sinál oioin ne’ebé hatudu sala ida-ne’e mai ita, hanesan degradasaun ambientál, ansiedade, lakon sentidu moris no konvivénsia sosiál nian” (LS 110).

Mai ita sai hanesan Jezús: hatene rona atu aprende; husu atu sai boot; no sai boot, ita sai tasak atu fó fuan di’ak iha ninia tempu (iha ninia tempu no la’ós tarde).